

## SU ZINGAREDDU

Unu sonu malinconicu 'e organittu  
s'intended' istasero in sa carella:  
sonu tristu, sonu 'e fortunella  
chi nd'intrad' in ossos che-i- su frittu.

Accuguzzadu in sa larga gabanella  
unu zingareddu in d-unu cantu,  
cun sos ojos lughidos de piantu,  
pedit s'alimusina a chie passat.

Calecunu si firmat e li lassat  
in sa manu cancarada chentu francos.

Attesu dae sos montes biancos  
ispuntat sa luna in su fundale  
mentre su sonu tristu 'e s'organittu  
si perdet in su frittu de Nadale  
che sos passos in su lenu iscurigare.

Su pizinnu acconcoladu in su portale  
luego chinnit sos ojos pro sognare  
una mamma amorosa chi li nada:  
"dormi fizu so 'ennida a t'anninnare".

BELLAVISTA

PIER LUIGI LA CROCE

TONARA